

Erindisbréf fyrir Velferðar- og jafnréttisnefnd Skeiða- og Gnúpverjahrepps

I KAFLI

Almenn ákvæði

1. grein

Um málefni nefndarinnar

Velferðar- og jafnréttisnefnd er skipuð af sveitarstjórn Skeiða- og Gnúpverjahrepps og er henni ætlað að vinna að velferðar- og jafnréttismálum í sveitarfélaginu. Nefndin skal starfa eftir erindisbréfi þessu sem sveitarstjórn hefur staðfest og almenningur skal hafa greiðan aðgang að, skv IV. kafla sveitarstjórnarlaga nr. 138/2011, II. kafla stjórnsýslulaga nr. 37/1993 og að öðru leyti eftir því sem lög og reglugerðir segja fyrir og sveitarstjórn felur henni.

2. grein

Um skipan nefndarinnar

Velferðar- og jafnréttisnefnd er skipuð þremur aðalfulltrúum og jafnmörgum til vara. Sveitarstjórn skipar formann nefndarinnar en að öðru leyti skiptir nefndin með sér verkum.

3. grein

Hlutverk nefndarinnar

Velferðar- og jafnréttisnefnd er ráðgefandi nefnd sem gerir tillögur til sveitarstjórnar. Nefndin getur enga bindandi ákvörðun tekið nema með samþykki sveitarstjórnar, nema nefndinni hafi áður verið falin fullnaðar-afgreiðsla einstakra mála.

4. grein

Markmið nefndarinnar

Markmið með starfi Velferðar- og jafnréttisnefndar er að styrkja og efla þá málaflokka sem undir hana heyra fyrir íbúa Skeiða- og Gnúpverjahrepps. Ennfremur skal nefndin leitast við að ná því grundvallar-markmiði að tryggja að ákvarðanir hennar og vinna séu fyrst og fremst í þágu allra íbúa sveitarfélagsins, sem leggur þær skyldur á herðar fulltrúum í nefndinni, að setja ávallt almenningshagsmunum ofar sérhagsmunum hvort heldur er sínum eigin eða einstakra hópa.

II KAFLI

Verkefni

5. grein

Um helstu verkefni

Meðal verkefna Velferðar- og jafnréttisnefndar eru:

- Að vera sveitarstjórn til ráðgjafar og veita umsögn um erindi sem tilheyra velferðar- og jafnréttismálum.
- Að fjalla um málefni er lúta að velferðar- og jafnréttismálum þegar tilefni gefast til hverju sinni og gera tillögur til úrbóta eða breytinga í málaflokkunum eftir því sem nefndin telur ástæðu til.
- Að fjalla um samstarfsverkefni við önnur sveitarfélög sem eru í gangi á hverjum tíma í tilheyrandi málaflokkum.

- Nefndin hefur með velferðar- og jafnréttismál að gera og er henni ætlað að fylgjast með þeim áætlunum sem sveitarstjórn kann að setja um þes háttar málefni.
- Vinna að jafnréttisáætlun fyrir sveitarfélagið með sveitarstjórn.

III KAFLI

Fundir og starfshættir

6. grein

Boðun funda

Formaður Velferðar- og jafnréttisnefndar boðar til funda svo oft sem þurfa þykir, þó ekki sjaldnar en tvisvar á ári og skal formaður stjórna fundunum.

Boðað skal til fundar ef einn eða fleiri nefndarmenn óska eftir því enda tilgreini þeir fundarefni. Til fundar telst löglega boðað hafi allir nefndarmenn, eða varamenn í forföllum þeirra, verið boðað er með að minnsta kosti tveggja sólarhringa fyrirvara. Og skal þeim jafnframt greint frá dagskrá fundarins. Starfsfólk skrifstofu sveitarfélagsins annast boðun funda nefndarinnar í samráði við nefndarformann. Komi upp þær aðstæður að mál þarfnist skjótrar úrlausnar getur fyrirvari um fundarboðun verið skemmri, svo framarlega að enginn af nefndarmönnum andmæli því.

Nefndarfundur skal haldinn fyrir luktum dyrum. Nefndin hefur heimild til að boða á sinn fund starfsmenn sveitarfélagsins eða öðrum aðilum, telji hún að þess gerist þörf.

7. grein

Réttindi og skyldur

Nefndarmönnum er skylt að sækja fundi Velferðar- og jafnréttisnefndar, nema lögmaet forföll liggi fyrir.

Þeir sem sitja fundi nefndarinnar skulu gæta fyllsta trúnaðar um þau einkamál sem kunnu að verða rædd á fundum hennar, fyrirmælum formanns og leynt eiga að fara samkvæmt lögum. Þagnarskylda fellur ekki niður þó nefndarfulltrúi láti af stöfum í sem slíkur.

Á nefndinni hvílir upplýsingaskylda til þeirra er mál varða og skal formaður greina málsaðilum frá úrslitum mála, en ekki aðrir nefndarmenn.

Um réttindi og skyldur fer að öðru leyti samkvæmt. IV. kafla sveitarstjórnarlaga nr. 138/2011, II. kafla stjórnsýslulaga nr. 37/1993 og 50. grein Samþykktar um stjórn sveitarfélagsinsin Skeiða- og Gnúpverjahrepps nr 415 frá 2022.

Nefndarmönnum er skylt að starfa eftir siðareglum kjörinna fulltrúa í Skeiða- og Gnúpverjahreppi.

8. grein

Ályktunarhæfi

Velferðar- og jafnréttisnefnd getur enga ályktun gert nema meirihluti hennar sitji fund og löglega hafi verið til hans boðað. Verði atkvæði jöfn ræður atkvæði formanns.

Nefndarmaður getur ekki fjallað um mál er varða hann sjálfan eða nána venslamenn hans svo mjög að ætla megi að afstaða hans mótist að einhverju leyti þar af og skal hann í slíkum tilvikum víkja fyrir varamanni sbr. 20. og 47. grein sveitarstjórnarlaga nr. 138/2011 og II kafla stjórnsýslulaga nr. 37/1993.

9. grein

Fundargerðir

Rita skal í rafræna fundargerð öll mál sem fjallað er um í Velferðar- og jafnréttisnefnd og skulu allir viðstaddir rita nöfn sín undir prentað eintak hennar og setja upphafsstafi sína undir hverja blaðsíðu fundargerðar, sem tölusettar skulu í áframhaldandi töluröð. Rita skal í sérstaka fundargerðarbók að fundargerð sé skráð í tölvu ásamt dagsetningu fundar og fjölda blaðsíðna rafrænnar fundargerðar. Allir fundarmenn skulu rita undir þessa fundargerð. Að öðru leyti fer með fundargerð samkvæmt 33 grein Samþykktar um stjórn sveitarfélagsins Skeiða- og Gnúpverjahrepps nr. 415 frá 2022.

Fundargerðarbók, afrit af skýrslum og skjölum, reglugerðir og erindisbréf Velferðar- og jafnréttisnefndar skulu vera tiltæk á öruggum stað. Formaður skal sjá um að afrit af fundargerðum nefndarinnar séu send sveitarstjórn til kynningar og/eða til samþykktar að loknum hverjum fundi. Nefndarmenn eiga einnig rétt á að fá afrit af fundargerðum hennar. Sveitarstjórn sér til þess að fundargerðir nefndarinnar séu birtar á heimsíðu sveitarfélagsins.

10. grein

Meðferð mála

Velferðar- og jafnréttisnefnd skal á fundum sínum taka fyrir þau erindi sem henni berast. Skal þar fjallað um þau og gera tillögur til afgreiðslu þeirra til sveitarstjórnar, nema sveitarstjórn hafi falið henni fullnaðarafgreiðslu málsins sbr. 3 grein þessa erindisbréfs. Þá skal formaður, strax að lokinni afgreiðslu, tilkynna málsaðilum niðurstöður málsins.

IV KAFLI

Hæfi, réttindi og skyldur nefndarmanna og annarra fundarmanna

11. grein

Réttindi og skyldur

Um réttindi og skyldur nefndarmanna gilda, eftir því sem við á, ákvæði II. og III. kafla sveitarstjórnarlaga nr. 138/2011, sbr. einnig IV. kafla sömu laga og III. og IV. kafla í Samþykkt um stjórn sveitarfélagsins Skeiða- og Gnúpverjahrepps 415 frá 2022. Nefndarmönnum er skylt að kynna sér þessi ákvæði.

12. grein

Hæfi nefndarmanna

Um hæfi nefndarmanna í Velferðar- og jafnréttisnefnd gilda ákvæði 20. gr. sveitarstjórnarlaga nr. 138/2011, II. kafla stjórnsýslulaga nr. 37/1993 og Samþykktar um stjórn sveitarfélagsins Skeiða- og Gnúpverjahrepps.

Um hæfi annarra sem sitja fundi Velferðar- og jafnréttisnefndar gilda ákvæði II. kafla stjórnsýslulaga nr. 37/1993.

13. grein

Fundarsókn

Nefndarmönnum er skylt að sækja alla fundi Velferðar- og jafnréttisnefndar nema lögmæt forföll hamli svo sem önnur brýnni skyldustörf eða veikindi. Sé nefndarmaður forfallaður um stundarsakir skal hann tilkynna eða láta tilkynna forföllin til formanns svo hægt verði að boða varamann hans á fund.

14. grein

Þagnarskylda

Nefndarmaður skal gæta þagnarskyldu um það sem hann fær vitneskju um í starfi sínu og leynt á að fara vegna einka- eða almannahagsmuna samkvæmt lögum eða eðli máls. Þagnarskylda helst áfram eftir að nefndarmaður lætur af þeim störfum. Þetta ákvæði á einnig við um aðra fundarmenn.

Nefndarmönnum er skylt að starfa eftir siðareglum kjörinna fulltrúa í Skeiða- og Gnúpverjahreppi.

V KAFLI

Málsmeðferðarreglur nefndarinnar

15. grein

Málsmeðferð

Við meðferð mála hjá Velferðar- og jafnréttisnefnd, er varða rétt og skyldu aðila að stjórnsýslumáli, skulu nefndarmenn gæta ákvæða stjórnsýslulaga nr. 37/1993.

16. grein

Jafnræði og meðalhóf

Við úrlausn mála skal gæta samræmis, jafnræðis og meðalhófs skv. stjórnsýslulögum nr. 37/1993. Aðili máls skal eiga þess kost að tjá sig um efni máls fyrir Atvinnu- og samgöngunefnd áður en tekin er ákvörðun enda liggi ekki fyrir í gögnum málsins afstaða hans og rök.

17. grein

Upplýsingaskylda

Aðili máls á rétt á því að kynna sér skjöl og önnur gögn er varða mál hans með þeim takmörkunum sem getið er um í 16. gr. stjórnsýslulaga nr. 37/1993 og upplýsingalögum nr. 140/2012.

18. grein

Ákvarðanir og leiðbeiningar

Ákvörðun Velferðar- og jafnréttisnefndar skal tilkynnt aðila máls skriflega. Hafi umsókn aðila verið hafnað eða ekki tekin til greina að öllu leyti skal fylgja tilkynningunni rökstuðningur eða leiðbeiningar um heimild aðila til að fá ákvörðun rökstudda. Einnig skulu fylgja leiðbeiningar um kæru- og endurupptöku–heimild og fresti til að kæra eða endurupptaka mál.

VI KAFLI

Endurupptaka máls

19. grein

Endurupptaka

Eftir að nefndin hefur tekið ákvörðun og hún verið tilkynnt, á aðili máls rétt á því að mál sé tekið fyrir að nýju ef ákvörðun hefur byggst á ófullnægjandi eða röngum upplýsingum um málsatvik eða ef íþyngjandi ákvörðun um boð eða bann hefur byggst á atvikum sem hafa breyst verulega frá því að ákvörðun var tekin. Endurupptaka er heimil innan þriggja mánaða frá því að aðila máls var eða mátti vera kunnugt um ákvörðunina.

Aðili máls skal beina kröfu um endurupptöku máls til sveitarstjórnar.

VII KAFLI

Stjórnsýslukæra

20. grein

Stjórnsýslukæra

Aðila máls er heimilt að kæra ákvörðun Velferðar- og jafnréttisnefndar til æðra stjórnvalds sem við á til þess að fá ákvörðun fellda úr gildi eða henni breytt nema annað leiði af lögum eða venju.

Kæra skal borin fram innan þriggja mánaða frá því að aðila máls var tilkynnt um ákvörðun nefndarinnar, nema lög leiði til annars frests. Stjórnsýslukæra frestar ekki réttaráhrifum ákvörðunar meðan málið er til meðferðar nema æðra stjórnvald mæli svo fyrir.

VIII KAFLI

Gildistaka

11. grein

Gildistaka

Erindisbréf þetta, sem byggir á ákvæðum sveitarstjórnarlaga nr. 138/2011, stjórnsýslulögum nr. 37/1993 og Samþykkt um stjórn sveitarfélagsins Skeiða- og Gnúpverjahrepps nr. 415 frá 2022 tekur gildi við samþykkt þess af sveitarstjórn Skeiða- og Gnúpverjahrepps. Með samþykkt erindisbréf þessa fellur úr gildi eldra erindisbréf.

Samþykkt í sveitarstjórn Skeiða- og Gnúpverjahrepps 17.08.2022

Samþykkt á fundi Velferðar- og jafnréttisnefndar xx. xxxx xxxx.